

ramtharchanchinbu@gmail.com

Estd : 1984

RAMTHAR (Mission)



February 2011



Nun Krista 14

*Ramthar Association Chanchinbu Thla Tin Chhuak***Editorial Board 2010**

Editor	:	Upa Zoramthanga	9436362385 (M)
Joint Editors	:	Upa R. Lalmalsāwma	9436154179 (M)
		Upa Lalhriata	9863226630 (M)
News Editor	:	Pu Lalbiakēnga Fānai	9436366234 (M)
Manager	:	Nl. H. Lalngūrliani	9774390980 (M)
Publisher	:	Rev. Lalchhuanmawia	2325899(O)

Member-te

Rev. C.Lalsangliana	Synod Moderator
Rev. PC Pachhunga	Synod Secretary (Sr.)
Rev. Lalzuithanga	Executive Secretary i/c Mission
Rev. K. Lalhmuchhuaka	BEC member
Upa C. Malsawmkima	BEC member

Kum khat lak man Rs. 45.00

- * A bu la duh leh a man pe duh chuan Nl. H. Lalngūrliani, Manager, Ramthar, Synod Office, Aizāwl-796001 hriattir tūr.
- * Ramthar chanchinbua thu chhuahte hi a ziaktu mawhphurhna a ni.
- * Thu chhuah tūr chu phêk lehlam chauhva ziakin Editor, Ramthar, Synod Office, Aizāwl-796001, Mizoram, India hnēnah thawn tūr.

A CHHUNGA THU AWMTE

1. Editorial	3
2. Keimahni	4
4. <i>Buhmun aqangin</i>	
1) Isor samung tangmo	5
2) Tripura Mission Field-a Thlarau Thianghlim hnathawh	7
3) Chakma Bial lamah chuan	11
4) Lalpan min pe leh ta	14
4. <i>Sermon</i> : Nun Krista	16
5. Bangladesh-a Pathian tihdamna ropui	18
6. Chanchin Tha kawltu ram an lo thleng ta si	23
7. Ramthar Field tlawh Report	25
8. Combodia lam ve thung aw	31
9. Rawngbawl nana thilpek petute	33

*Editor thuchang**Pathian Lalna*

Kan awmna Kohhran theuhvah kum 2010 chhunga chatuan ram min pansantu eng emaw zat kan sun liam hnuah kan fel bik vang ni hauh lovin kum 2011 hruai thlen kan ni leh ta a. Thlasik khaw vawt hrehawm tak a her liam tan a, tunah chuan kawrlum tha hâk tûr pawh nei lote tan thal boruak lum nuam tak mai a thlawnin pèkin kan awm leh tan ta. Eng ti tûrin nge chung Pathian hian kei leh kan hnam hi he hun lawmawm tak hi min hruai thlen le?

Kan inen fiahna atan Thuthlung Hluia Pathian hnam thlan Israel-te chunga Pathian rorel dan kha i'n thlir teh ang. A duhzawng anga an awm a, a thupêkte an zawm chuan malsawmsakin an awm a; an hmelmate lakah a hnam pumin humhim an ni a, mipuite an zalen thin. An chhehvel hnamte'n an hlau va, an tlawn a, anmahni nena remthu thlun an châk thin. Hei hi Pathianin a humhim leh chawimawi avanga an ropuina a ni.

Israel-te'n malsawmna an dawn chu chapopuiin nawmchen nan leh intihropui nan an hmang ta fo va. Hnamdang pathiante biain Aseri-te an siam a, Jehova hre ve lo hnam dang mi nupuiah te an neiin anmahni tungdingtu chu an uiresan fo tâk avangin Pathian thinurna an chungah leihbuak a ni ta. An hmelmate tihchak an ni a, Assuria sawrkarin duhtâwkin a sawisa a, ram hrang hrangah sawn darhin Samari khawpuia a awm chhunte chhinal (assimilate) tûrin hnam dang mi tam tâwk tirh luh an ni a. Israel hnam sawmte chanchin hi waviin thlengin hriat tûr a awm ta lo.

Israel-te Pathian kha waviina kan Pathian ropui tak, mihringa lo chang, thlarauva tuna kan hnena awm hi a ni a. A kutah ropuina te, chawimawina te, lalna leh thuneihna te a awm a. Amah tihute leh a thupêk zawm thin hnam leh ram te, mimal te a chawimawi a, a humhim thin. A dânte pawisa lo leh uiresantute tichhe tûrin an ngam loh tûr hmelma tundin dan kan Pathian hian a thiam kher mai.

Chanchin Tha avangin waviin niah taksa leh thlarauva malsawmna kan chante hi kan lo hmu a. Daniela ang khan hlauh tûr dik Pathian taka hi hlau ila, Lal Isua kraws bulah tlu lût lehin Pathian hnenah ngaihdam dil ila, kan ram rorelna leh keimahni theuhah hian lalna leh thuneihna chang leh teh se.

KEIMAHNI

1. Office thar luah a ni ta: Kohhranhote'n lungrual taka sum tam tak sênga kan sak Synod Office thar chu ni 5.1.2011 khan luah tan a ni ta a, a lawmawm hle mai. He Office thar hi Pathian ropui nan leh Kohhranhote'n a malsawmna kan dawnna hmun ni tûrin ãawngtaïin i hlan thar zel ang u.

2. Missionary tîrh chhuah programme: Ni 9.1.2011 (Pathianni) zan khan Mission Veng Kohhran Biak Inah Missionary tîrh chhuah inkhawm buatsaih a ni a. Missionary Pastor 19 leh Contract Missionary 62, an vaiin mi 81 tîrh chhuah an ni. Synod Moderator Rev. C. Lalsangliana'n he tîrh chhuah rawngbawl hna hi a thawk a ni.

3. Innei thar: Rosangliana, Headmaster, NEM School, Zaite, Cachar Tlangrama thawk leh Lalchungnungi, E/T, LCM High School, Moirang, Manipur-a thawk chu Ni 11.1.2011 khan Kohhran Dan thianghlimin an innei. Pathian malsawmna dawnga fanau maltluan chawia Pathian ram tan lungrual taka thawk dun zel tûrin duhsakna kan hlan e.

4. Tuarpuina: Ganganagar, Tripura-a kan contract missionary Pi Lalrohluï pasal Pu Lalremruata chu Krismas ni tak December 25, 2010 tlai lam dar 5:00 vel khan a lei taksa kan lo ãhen ta a, a pawï ãhin hle mai. Khawhar lusun chhungkuate Lalpa'n awmpuiin thlamuan zel rawh se.

5. Damlo: Rev. Lalzuithanga, Exe. Secretary i/c Mission, etc., chu cancer avangin Vellore-ah hun enge maw chen a awm hnuin tunah dam ãha zawkin a lo chhuak leh ta a. Office pawh a kal peih ve zel a, a lawmawm hle mai. A ãhat zel theih nan Kohhranhote'n ãhahnemngai takin i ãawngtaïpui zel ang u.

6. Internet la awm lo: Office tharah Internet la thlun loh a nih avangin Chanchin lawrkhawm kan han tichhuak thei rih lo va, chhiartute'n min ngaihdam kan dil e. Rei lo têah Internet hi neih thuai beisei a ni.

Buh hmun aṭangin:

ISOR SAMUNG TANGMO

(Pathian hnathawh)

Upa Zasiama, Leader

Bru Gospel Team, W. Phaileng

Gurguty khuaah chawlhkar khat rawngbawlina kan neih hnuin Dt. 1.11.2010 (Thawhṭanni)-ah Bru Gospel Team-te chuan K. Sarali khua, Kawrthah khaw chhuah lam km. 10 vela hla kea kal ngai chu kan pan leh ta a.

He khua hi Bungthumtlangval Zarzokima thah a nih avanga ṭhalai ṭhenkhat thinrimin an in leh lo meivâpa an chantir khua kha a ni a. Mahse, tunah chuan Pathian khawngaihna leh sorkar hmalâknain in leh lo chān zawng zawngte hnenah in chung tûr rangva pêk vek an ni a. Chu bâkah an rasion *khul*-na tûr thla tin ṭum hnih pawisa faia pêk ṭhin an ni bawk. Tunah chuan Mizoram Bru khuaah chuan rangva in tamna ber a ni hial tawhin a rinawm.

Helaia Evangelist leh Kohhran hruaitute ṭhahnemngaihna in sum leh pai lam awm vak lo chungin Camp-ing tûra rel leh hma lâk a ni a. Pathian rinchhanin Campers tûr leh camp lûtte ei tûr chu a awm mai ang tiin ni 2.11.2010 (Thawhleleh zan) aṭanga camp lût

tûrin ruahman a ni ta a ni. Kawrthah lam aṭangin Upa Rongura, T.Upa Rimawia, Pi Thangi leh Pi Chawii te an lo chhuk ve hlauh mai a, a thlamuanthlâk hle. Pi Thangi leh Pi Chawii erawh chuan chhiat tawhna avangin a tâwp min thlenpui ve thei ta lova, pawî kan ti hle. He camp neihna atan hian school zirtirtu, SSA-a thawkte an ṭangkai hle bawk. Camping kan neih nan leh kan neih hnua Pathian hnathawh (*Isor samung tangmo*) ṭhenkhat târlan ve kan duh a, chungte chu:-

1) Khaw chhunga IR awmte chuan (Zu khap burna dan ni lovin) kar khat chhunga vawk khung vek tûra order an chhuah tawh chu camping-a luh duhte tan chawlhkar khatin hun an pawhseisak a. Hei hi Pathian hnathawh chu a ni pawt mai.

2) Hemi chawlhkar chhunga

khawtlang inhlawhna (NREGS) chu camping zawh lama thawh atan an sawn ve leh thei ta hlah baw a. Hei pawh hi Pathian hnathawh tih loh rual a ni lo.

3) A dang lehah chuan campers zinga mi Milepa chuan hetiang hian a sawi a, “Tunhma chuan lekhaden leh pawisa khelhi hi nuam ka tiin ka pawisa hmuh ang angte pawh hemi atan hian ka khawhral thin a. Ka nupui fanaute rilru pawh ka tihahin ka tihrehawm hle thin. Tunah chuan in thusawi ka ngaihthlâk atengin ka rilru a danglam vek tawh; heng thil hi ka bansan vek tawh dawn, thinrim duhna leh inhauh duhna pawh a bo vek tawh. Chuvangin ramhuai hnena inthawi nana ka intiamna ‘MANASI’ pawh Pathian hminga paih vek ka duh a; in remchan hunah minrawn paihsak rawh u,” a ti a. Ni 7.11.2010 (Pathianni) zing dar 7:00-ah Team-ho leh Upa Rongura, T.Upa Rimawia leh tualchhunga Kohhran hruaitute nen an inah kalin kan tawngtai rual hnuah an kawtah MANASI chu kan hâl ral ta a ni. Setana’n hun rei tak a rilru leh taksa a lo phuar tawhna chu Isua Krista hmingin phelhsak leh halralsakin

a lo awm ta. Lalpa chu fakin awm rawh se.

Camp hi ni 6.11.2010 (Inrinni) zingah kan chhuak a. Camper zawng zawng hlim tak leh lawm takin an chhuak vek niin kan hria. Tawngtai an taimain zan inkhawm ban leh zing tawngtai inkhawmah pawh an kal taima hle. Chhun lamah naupang pual ‘Lâng Camp’ buatsaih leh a ni baw.

Manasi kan halralsak tâk Milepa chuan ni 8.11.2010 (Thawhtan) zanah kohhran ho a ina lêngkhawm tûrin an sâwm a; zan inkhawm banah Mike leh khuangpui nen kan thawk thla a, kan han zai mai chu a chângin Good Friday lam hlaah kan chêng a, a changin Krismas kan urlawk hi a ni ringawt mai a, a hlimawm hle. Team member Nl. Dipti-i’n thuchah tawi tê darkar khat lek thahnemngai tak leh tang takin a sawi a. A ngaithlatute pawhin an kham lo hlein a lang.

In neitute’n thingpui thlum leh chhang an lo buatsaih baw a. Anni chhungkua pawh an hlim hle a ni tih a hriat theih a ni. A tuk ni 9.11.2010 (Thawhlehi) zanah ve thung chuan Remthanga pain, “Hei

zan thum ngawt mai ka mutnaah mi pakhatin (a mumang a nih leh nih loh a Chiang lo) ringlo ina ɬawngɬai tûrin min ti a. A vawi thumnaah phei chuan ka bân vei lamah minrawn kaithovin, ‘Ka thusawi kha i la ti na nge?’ minrawn ti a. Ka ɬawngɬai thiam bawksi lo va, a ngaihna pawh ka hre lo; zanah ka in lamah minrawn inkhawmpui phawt mai teu,” a ti a. Ani hi a hming maia Kristian, a châng a Bawlpu-ah te pawh ɬang leh zawk bawksi thin a ni âwm e. Camp-ah pawh riak lovin lêngin arawn inkhawm thin a ni. Zan inkhawm banah an in lamah chuan kan kal khawm a. Mi paliin thuna hun kan sawi a,

kan zai khawm nghal bawksi a. Amahah Pathian hnathawh a lan chhunzawm zel kan beisei.

Heng Pathian hnathawh lo langte hi Camping kan neih tûr hriaa ɬahnemngai taka min lo ɬawngɬaisakna Pathianin a chhanna a ni e.

I ɬawngɬaipui ang u :

1) Milepa (Chhungkaw member 6) Manasi paihsak tákete tân.

2) Remthanga pa, ringlo ina ɬawngɬaina hmang tûra kohna dawngtu tân. Huaisen taka a tih theih nan.

3) Campers chhuak zawng zawngte tân leh K. Sarali Kohhran tân.

TRIPURA MISSION FIELD-A THLARAU THIANGHLIM HNATHAWH

(Chhunzawmna)

Evan. Rohmingliana

Agartala, Tripura Mission Field

Hun hman dan : Tuikual Kohhran Hall-ah kan thleng khawm a. Zirtawpni nilengin rawngbawlina hmun hrang hrang kan tlawh a, zan lamah Biak In hrang hrangah kan inkhawm kual thin.

Kohhran hlim lai tak a lo ni hlawm bawksi nen, nuam kan tihle mai. Tin, Inrinni zanah Dawrpui Biak Inah Rev. K.Lalpiangthara leh Tuikual Bial

Secretary Upa T. Lallawmkima tehovin kan inkhawm a. Crusade an hmang mêk a lo ni a. An Biak Inah hian Chanchin ɬa Bawm, Pu Robuanga te'n an buaipui,

khaw tina an zawn kual, Burma lam te pawh thleng hiala lo kîr leh an lo kawl lai chu inkhawm banah kan en a, kan inhrilhfiiah a. Bawm vuana kan han ãawngtãi rual chu leh, mak tak maiin Thlarau Thianghlimin thinlung chungah thawkin sual inhriatna neiin, a then ãapin a then taksa chêtñain a man bawk a; ãawngtãi a tâwp thei ta lo va, Pathian fak hla sain kan chhunzawm ta a ni. Zan dar 11:00 hnu lamah Pastor-in thuchah sawiin, ãawngtãinain tâwpna a siam chhunzawm nghal a, kan ãin thei ta hrâm a. Sawi tûr la tam hle mah se helam chu kalsan rih pawt ta ila.

He Harhna hi Tripura Mission Field-a Khumulwng Bial kohhran hrang hrangah a chhunzawm zel a, Pathian hnathawh a ropui hle mai.

Tuiraja : Tuiraja-a a lo darh zel dan hetiang hian sawi dawn ila. Tuiraja hmun hi Mission Centre, Nl. Lalramthari thawhna hmun a ni a. Tin, he khua hi khaw sual tak, khaw thenawm pawhin kal tlang an hreh ngawih ngawih, nupui pasal zawn nan pawh an duh loh a ni a. Tlai khua a thim tawh chuan tu mah an kal tlang ngai lo va, a khaw mi leh sa ngei pawh zana-

an chhuak ngai lo va, zan dar 6/7 velah pawh zan reh a ni nghal mai thin kha a ni a.

He khua hi Lalpa'n a kohhran din nan a duh nia ngaiin keini Prebyterian Kohhran chuan Lalpa min pêkah kan ngai tlat a. Ringthar nula leh tlangval thenkhat pawh min pe nghal rêng bawk a. Heng ringtharte hi Pathian thu hriat belh châkin an tuihal êm êm a; an nu leh pate leh khawtlang an vei êm êm bawk a ni.

Ni 22. 10. '10 zing a lo ni a, ringthar tlangval, an kohhran chairman-a an hman mêk Tv. Soten Debbarma chu Presbytery inkhawmpui lai khan Pi Mary, Tuikual ațanga lo kal chuan a ãawngtãisak a. Tih tûr a pêk, tuilum in tûra a tih chu a in a, tichuan amahah taksa chêtñain a rawn thawk ta nghal a. A khûr a, nikhaw hre lo ang maia a buai che vêl chu mak tiin an thlir thup mai a. Chutah Thlarau Thianghlim chuan thu a sawitir ta a. A nu leh pa, u leh nau zawng zawng ko khawmin an dinhmun hlauhawmzia leh sual kawnga kal an nihzia te, chhandam an nih loh tûr thu te, an pathian biak dik lohzia te chu a au chhuahpui ta piap piap mai a ni, a ropui hle mai. Tin, a

ringtupui, an member-hote a ko bawk a, an chak lohna laite sawi chhuakin, Pathian hnenah ngaihdam an dilna lai tûrte a hrilh mawlh mawlh a, anni pawh chuan thu awih taka Lalpa lam hawiin an ãawngtai nghal bawk a.

A u NI. Reena Debbarma leh thenawm nula Onita Debbarma te chuan taksa chêtna an chang ve nghal bawk a. Onita chuan namenlova ãawngtai leh Hallelui pein Pathian a fak a, a nu leh pa a vei nghal êm êm bawk a. A nu chu an koksak nghal a; a hmaah thingthittirin a ãawngtaisak nghal a. Lal Isua ringa baptisma chang a, an sakhaw hlui kalsana Lal Isua chauh vuan tawh tûrin an inkawhlmuh a. A pa erawh chu a lo awm remchâng lo hlauh a ni.

Debbarma hnam hi Vai ang bawka nu leh pa zah thiam êm êm an ni a. Mahse, Thlarau Thianghlim chuan an tih ngam loh tûr pawh a tihtir thei a ni

A ngawng chhuahte:-

- 1) Inkhawm an khapsak nghal a. An khuah pawh awm lovin a lehkha zirna lamah an tir bo nghal.
- 2) Thawktuin a dawî ât-ah an puh.
- 3) Mî â, mî ang lovah ngaiin thi tûrah an ngai.

A rah tha lam:-

- 1) Baptisma chang thar an

awm nghal.

- 2) Ringtharte a tinghet a, a tiâng.
- 3) Inkhawm a nuam a, an hlim phah.
- 4) Khaw râlti tak ni thin kha khaw ralmuang leh muanawm tak a lo nih phah ta.

Burma Kohhran-ah :

Khumulwng Bial chhung kohhran pakhat Kaipeng ãawng hmanna Burma kohhranah chuan Mizoram ațanga harh tharna kan hawn thlâk te chhawm nun zel nan tiin Bial Standing Committee chuan Revival Meet ni 5-7. 11. '10 khan a buatsaih a. He programme hmang tûr hian budget leh sum hman tûr engmah ruahman lâwk a awm lova, huphurhawm kan ti hle. “Rinnain i kal tawp mai ang u,” tiin mahni zanriak buhfai tûr paia insêngso tûrin Kohhranhote kan inngen ta ngawt mai a ni. Lalpa'n kan ãawngtaina chhângin pawn lam ațanga kal mi 50 chuang leh a thlengtu kohhran member 30 velte nen programme hman a ni ta a. F/S Rev. Zorammawia, Speaker chuan thuchah nung tak takte hmangin sermon wavi 6 a sawi a. Kal khawmte'n kan hlawkpui hle a, inkhawm leh

zaikhawm a nuam thei hle. Taksa chêtna nei sate leh dawng tharte nen a hlimawm hle a ni.

Thil mak : Mizorama excursion neih ùma kal ve NI. Bubhani Koloi, Dawrpui Biak Ina ùawngtai kan neih ùma pawl tharna chang, lâw reng mai leh ùawngtai reng mai chu, revival programme kan ùan zan inkhawmah Pathian faka kan zai laiin thisenin rawn farin theh ùawt ùawt ang maiin a taksa, a lu leh bâw, kawr bâwah te kaiin, a hlabu ken lai leh a hmaa ùuthtleng ruakah te a per nuai baw a ni. Kei ngei pawhin a taksa ena, chunglam thlêk leh a, a buai vel lai chu ka va hmu ve nghe nghe a. In chung aùanga dai far ni mai tûrah ka ngaihpui a. Inkhawm bâna thisen far a ni tih kan hriat chuan kan han chhui kual vel a. Zawhtêin sazu a man a, a ei a ni ang kan tih lahin chutiang hnuhma eng mah kan hmu si lo. Biak in hian ceiling a nei hek lo. Pawn aùangin thehtu an awm a nih ringin kan han thlêk kual leh a; mahse, a sira ùu Pi Hmingthanzuali chuan engmah a kai ve baw si lo; thil mak tak zawng a ni ngei mai. Kil tin aùanga han ngaihtuah kual pawhin a awmzia chhuichhuah thiam a har hle a ni.

Thlarau sual hnathawh a nih mai theih ringin, a hlauh leh hlauh loh te kan zawh chuan a hlauh thu eng mah sawi tûr a nei lo. A hlauh miah loh avangin Thlarau Thianghlim thil tûah kan ngai a. Lal Isua'n thisen chhuaka chhandamna hna thawka a tuar natzia a rawn hriat nawntir leha ngaiin, "Lalpa'n a hmangaih che a, ama thisen ngeiin a rawn baptis che a nih hi," tiin kan fiam bawrh bawrh a.

Tin, Tripura Bial hrang hrangah kan sikul ùenkhat Calvary H/S Tuidu, Bethlehem English School, Noagang-ah te pawh zirlaiteah thawkin ùawngtai te, sual nih inhriatna tein a thawk a. Kristian la ni lo zirlaite paw'n Lal Isua hminga baptisma chan an duh a. Calvary H/S-ah pheichuan hming pe 14 zinga mi 9-in baptisma an chang ta nghe nghe a ni.

Heng kan sawi bâk pawh hi hmun hrang hrangah crusade programme neiin Thlarau Thianghlimin hna a thawk zel a, Pathian khawngaihna puan chhuahin a awm zel. Tripura tlangmite hi Lalpa'n a hmangaih a, thlarau lam hmasawanna, Thutak hriatna leh rinnaa puitlinnaah te, nghet taka dinga mahnia kal thei tûr tein

Thlarauvin a thuamin a tichak thar zel a ni.

Lalpa ram lo darh zau leh hmasawn zel hi Kohhranhote ÷awngt̃aina leh thilp̃ék hmanga rawngbawlna lo rah chhuak Pathianin min hmuhtir a ni a, min hriat belhtir baw a ni. Lal

Isua chawimawia a awm leh Setana tl̃awm lai min hmuhtir hi a va ropui tak êm! Mit vannei leh beng vannei Lalpa'n min pe a, Lalpa chu fakim awm rawh se! Kohhranhote'n i ÷awngt̃aipui zel ang u.

CHAKMA BIAL LAMAH CHUAN

Pastor Laldinpuia Hranleh

Marpara Ramthar

Marpara Ramthar Bial hi naupang tak, ni 17, January, 2009 (Inrinni)-a Synod Moderator Rev. Lalchhanhima'n a hawn kha a ni a. A ÷in tirh a÷angin he bial hian khaw nga huam nghalin, danzawhkim pawh bial pum huapin 246 kan awm a. Bial lian lo tak kan ni a, kan bial hian Marpara Ramthar, Silsuri, Hnahva, Hruiduk leh New Sachan te a huam a ni.

Marpara Ramthar bial hawn a nih rual hian Synod Mission Board chuan Home Mission North huam chhunga thawk t̃urin Chakma Gospel Team a siam thar hlauh baw a. Chu Chakma Gospel Team chuan Marpara Ramtharah awm hmun an khuar ve nghal baw a. Bial chhunga thawk t̃ur mi eng emaw zat dah thar an ni baw a. A lo awm sate nen bial tharah rawng kan bawl ho a, a hlimawm hle.

Marpara Ramthar bial hi Chakma hnam puala siam, kum

2006 Ramthar Enth̃atu Commis-
sion Report-a lo lang {Then 3-
na: XIII(5)} tihhlawhtlinna a niin
a lang a. Mizoram chhung chauh
pawh ni lovin, Chakma hnam
pual liau liauva Pastor bial ÷ing
hmasa ber a lo ni ta a ni. Bial
chhung khuate pawh Chakma
hnam hlang ch̃enna khua,
thawktute bâkin an ch̃en pawlh
lêm lohte an ni hlawm a.
Mizoram chhunga ch̃eng mah ni
se, Chakma ÷awnga thusawi te,
÷awng leh te, Pathian fak hla sak
te a ngai a. Hnam ze hrang nei an

nih avangin anmahni hre thiam taka rawngbawl a la ngai a ni. Hetiang dinhmuna anmahni puala bial thar a lo ding ta hi a lawmawmin a chhianchhiah tlâk hle.

Bial tharah rilru tharin, thawktute leh Kohhranhote'n thahnemngai takin rawng kan han bawl a. Chakma Gospel Team te pawhin bial chhung khaw tinte an han luhchhuak ta tak tak a. Bial chhung khaw tina thawktute leh Kohhranhote pawhin theihtâwp an chhuah bawk a. Khawpui lam leh bial pawn hmun dang aṭangin rawngbawla minrawn tlawh an awm zel bawk a. Pathianin a rawngbawltute thawh rimna chu ensan lovin mal a sawm a. Kum 2009 Presbytery inkhawmpui report-ah chuan kan bial chhungah ringthar Baptisma chang mi 211 lai an lo awm reng mai a; a ropui hle.

Bial thar hawn a nih hnu hian Pathian ram thilpêkah pawh hma kan sawn ve hle a. Mi rethei khawsak harsa tak tak kan nih avangin kan pêk tling khawm chu tam thei lo hle mah se, rawngbawltute'n thahnem an ngai a; Pathian ram ip lâkkhâwm ngai lohnaah te bul kan han ṭan thar a. Thilpêk lama hma kan

sawn theih nan ruahmanna thar te kan han siam a. Kan thilpêk sum leh pai erawh a pung chak lo hle. Kan lawmna ber zâwk erawh chu a tam emaw, a tlêm emaw, kan pêk zât chu eng pawh ni se, Pathian tâna pêk duhna thinlung pu kan pung a, petu kan pung zel hi a ni zâwk a ni.

Kan bial a din tirh lai khan Kohhran pakhatah chauh Kohhran Hmeichhia leh KṚP a la ding a. Bial KṚP leh Bial Kohhran Hmeichhia kan din thei ang em tih pawh rei tak kan ngaihtuah a. Pathian chauh rinchhanin huphurh tak chungin kan han din ve rawih a. Kohhran hrang hrangah a remchân dân angin KṚP leh Kohhran Hmeichhia te kan han din ve zel a. Bial din kum aṭangin Bial Kohhran Hmeichhe inkhawmpui leh Bial KṚP Conference pawh kan hman ve thei nghal a. Tun thlengin tuang takin kan la kal ve zel a. Pathian min hruaina hi a ropui hle a ni.

Kan bial chhunga thil thleng chhinchhiah tlâk tak chu Marpara aṭanga km 9 vela hla Begabekky khuua

Fellowship kan din thar hi a ni. Marpara-a thawktute'n he khuaah hian Outreach Programme te pawh an lo hmang tawh baw a. Chakma Gospel Team te pawhin beihpui an lo thlâk tawh baw. Hemi tum hian mi 19-in baptisma an chang a. Marpara Ramthar Kohhran chuan Fellowship dinin a enkawlzui ta a ni. Pathianni ah inkhawmpui tûrte insiamin a sûr a sa hnuaiah kan inkhawmpui hrâm hrâm zel a. Kum 2010 aţang chuan SMB-in he khuaah hian Evangelist arawn dah ta a. Ani hian he khuaa ringtharte hi a enkawlzui ta a ni.

Kan bial hmasawnna ropui tak chu Bial Zaipawl kan din ve thei hi a ni. Bial changtlung leh inkalpawhna tha tân chuan Bial Zaipawl din hi thil harsa a ni hauh lo ang. Mahse keini bial, solfa chu sawi loh, thalai tam zâwk zia leh chhiar thiam lo, khaw inkâr kîk leh inhlat tak takte tân chuan thil awlsam a ni lo va, thil huphurhawm a tling a ni. Mahse, Pathian zarah kan ding ve tlat si! Bial KTP-in an rawt angin kum

2010 Chhawrpial Presbytery Inkhawmpui hmasa berah pawh Pathian fakna hla wawi hnih lai an rem thei nghe nghe a. Bial Zaipawl hruaitute leh leh member-te an fakawm hle a ni.

Marpara Ramthar Bial hian Pathian malsawmna kan dawng nasa hle mai. Rawngbawlna kawngah pawh harsatna kan nei tam lo. Pathianin boruak ralmuang min pe a, tisa taka min dotu kan nei lo a; kan duhna hmunah kan lêng thei a, Pathian thu kan sawi thei a, a lawmawm hle. Bial chhunga thawktute thawh rimna pawh Pathianin mal a sawm a. Kumin (2010) Presbytery Inkhawmpui report-ah chuan ringthar baptisma chang mi 45 lai kan nei a, a lawmawm hle a ni.

Rawngbawlna tûr erawh a la tam hle a. Kan bial chhunga khaw tinah hian a zatve aia tam hi Buddhist an la ni vek a. Kristian chu tlêm tê kan ni. Kristian la awm miah lohna khua pawh kan bul hnaiah an la awm a; rawngbawltute tân chuan chona lian tak a tling a, ţan lâk a ngai hle. Kan bial chhung khaw tina Kristian leh Buddhist intam hleih dan tlângpui hetiang hian han târlang

ila (as on Aug. 2010):

Khaw hming In zât Buddhist Christian Mihring Buddhist Kristian

	in		in	zât	zât	zât
1 Marpara 'N'	370	295	75	1976	1689	287
2 Silsuri	615	566	49	3075	2915	160
3 Hnahva	216	196	20	1132	1079	53
4 Hruiduk	175	119	56	1182	1040	142
5 New Sachan	170	143	27	1840	1780	60
6 Begabekkya	63	53	10	320	286	34

A chungá *table* hi Kohhran inchhiarna leh Evangelist report aṅga lâk chhuah a ni a. Danglam thei reng ni bawk mah se kan bial chhunga Pathian ringtu leh la ringlote intam hleih dan a tilang Chiang viau âwm e. Thawh tûr a la tam êm êm a. Pathian chakna rinchhana inthlahdah lova, Pathian tâna inpêkna tak tak nena rawngbawltute'n rawng an bawl theih nan te, Krista tân nghet taka dinga, hun harsaah pawh Krista phatsan lo va Pathian tan rinawm taka an awm theih nan ringtharte pawh i ṭawngṭaipui zel ang u.

LALPAN MIN PE LEH TA

*Evan. Lalduhawma
Lunglei Chanmari Bial*

Lunglei Chanmari Pastor Bial Masihi Sangati Committee-in a lo rêl tawh angin Ni 02.08.2010 khan Bial chhunga Bengali pual bika Home Crusade buatsaih a ni a. Speaker-ah Pu Lalramzauva Ralte, Bawngkawn chu hman a ni. Zan tin zanriah chaw siamsakin ni 02-05 thleng Mission Centre Building satute hnenah Chanchin Ṭha hrilin rawngbawl a ni phawt a. Beiseina kan nei sang hle nain anmahni an lo invauin an lo indang ve bawk nen,

beisei angin engmah a thleng ta vela Bengali awmte zan tin ko
lem lo va. khawmin, zanriah buatsaihsak

Ni 06-08 Aug. chuan leh an ni a. Sangati member-
Upa Sangṭhuama inah a bul te leh hruaitute inpêkna a

nasa êm êm mai a, an chungah lawmthu ka sawi a ni. Muslim zinga rawngbawl a harsat tawh zia chu Masihi Sangati-a rawngbawl na hna thawktu zawng zawng leh Masihi Sangati member zawng zawngte tan hriat sa a nih avangin kan bei a dawng hman leh hle mai a. Ringthar a tam thei ang ber min pe tûr pawhin nasa takin Pathian hnenah kan dil a, kan ðawngtâi ngat ngat mai a ni.

Mihringte beidawn hnua mahni leh mahni inchawimawi ðhin kan Pathian chu a hun takahrawn chein, programme kan hman zawh

meuh chuan Mosolman mi 8 lai maiin dam chhunga Isua hnung zui tlat intiam chungin Masihi Sangati i/c Pastor Lalrinfela Pachuau kutah ngei mai Pa leh fapa leh Thlarau Thianghlim hminga baptisma an han chang mai chu lawmna mittui a luang nasa hle mai. Chhiartu zawng zawngte Pathian hnena lawmthu min lo sawipui tûrin kanrawn ngen bawka che u. “Kan awmna hmun ðeuh zelah Lalpa’n a ram tizau zual zel bawkrawh se,” tih hi kan ðawngtâina a ni.

A o jag ke log sabhi, Isu Raja bulata hain.

NGENNA

Kum te a lo thar leh ta a, Ramthar chanchinbu Missionary te tana laksak duh kan awm chuan a laksak theih reng e. Missionary te tana laksak duh chuan Agent-te hnenah in hriattir tur ani e

Sermon :

NUN KRISTA (*Philippi 1: 27-28*)

*Upa C. Laldawla
Phuldungsei*

Tirh. Paula'n thahnemngai taka lehkhha a thawnah hian rawngbawlnaah tuar a ngaih hun, lawm hun, hmuhsita awm hun leh harsatna hrang hrang tawh hun pawha Krista Chanchin Tha nena inmawia awmdan a pawimawhzia uar takin a sawi thin.

T.V-a NUN KRISTA programme kan hmuh thinah te hian mi thiam leh Pathian thua mi ril tak takte thusawi tha leh ropui tak tak kan lo ngaithla thin a, a lawmawmin a ropui ka ti thin a, ka ngaithla ning ngai lo.

Pathianin A Fapa thihna leh thawhlehnna hmanga misualte min chhandamna hi Chanchin Tha, sawi nawn nuam leh sawi nin theih loh chu a ni.

Khawvel tukverh kan dâk zau tial tial a; Isua ringlo mi, chhandam ni lo tûr tluklehdingawn tam tak an lo la awm si! Kan Synod Home Mission têah pawh hian Chakma, Bru, Vai leh hnam dang sang tam tak an lo la awm teuh mai si a. Chhimlam BCM ațanga chhiarpuia Chakma ringlo mi zozaita kha!! Home Mission North lamah pawh hian Chakma leh Bru ringlo mi sang

tam tak an la awm baw. An zingah khaw tam takah hi chuan sikul leh damdawi in te hial dinin tirhkoh leh zirtirtu tam tak Kohhran hrang hrangin kan tir mêk baw si a. Ruaitu Kohhran leh mi rawih (thawktu) te ngei pawh hian, “Lalpa tân ram ka la sâwt lo,” kan ti tlangpui baw a. Engtin nge maw kan tih dawn le?

Ramhuai NUAIA paitu pianthar tum pawh khan vawkruah tam takin an thihphahin vulhtu pawh khan chân nasa a intih teh kha maw!! Thlaraubo pakhat man hi a kheuneu lo êm a, Pathian rinchhanin i bei fan fan zel ang u.

Chanchin Tha kan hrilnaa pawimawh ka tih ve êm êm mai chu kan awmdan hi a ni. Mizote hi Kristian vek kan ni e kan ti si a, Chanchin Tha kan hrilhthe mithmuha kan awmdan hi a tha lama entawn leh zir tlâk

lohva awm leh nung engemaw zât kan awm leh si hian, kan missionary-te thawh ênsa leh hlim taka an lo hruai mêk ringtharte kan tibuaiin an nihna ngaijah an kir leh phah thin tih hi a takin a hmunah ka hmuin ka tawng tawh a. Chuvangin **Nun Krista** hi sawi vak a that rualin **a taka lantir** a va pawimawh êm!!

Kum 1957 khan Pukzing khuua Synod-in Dispensary a hawn laia Welsh missionary Pi Hruaii, ramthim vei êm êm khan Tuikuk khuua evangelist teacher-a thawk tûrin min sawm a. A hma kumin pawl 6 ka lo passed ve chiah bawk a.

Chung hun lai chuan Tirh. Thangzawna kha Sihphira thawkin Tirh C. Pazawna, {Rev. C. Pazawna (L) ni ta} te, Tirh. Hrangaii leh Tirh. Vanrampanmêka te Lawngkawr lamah an thawk a. Ka châk leh châk loh pawh ka hre chuang lo, î he lovin ka ‘aw’ mai a. Min tirhna tûr khua chu Nazaret Mualvawm, Phuldungsei aṭanga 15 km khawthlang lam, Keisalam lui ral leh lama awm a ni a. Phuldungsei aṭanga lang thei a ni. Kum khatah lawmman Rs 50/- min pe a. Tunlai ṭawng

chuan ‘Evangelist Teacher’ka ni mai ang chu.

Chhunah naupang, zannah puitling zirtirin, Kohhran inkhawm hun bi zawng zawng leh hun bi lovah pawh a ṭul dan azirin rawngbawlina ka nei a. Kohhrana awm dan, Kristian awm dan leh tih tûr leh tih loh tûr - Pathianni serh tûr, etc. theih ang angin ka zirtir a. Krista Chanchin Ṭha nena inmawi thei ang bera nun tumin ka hun ka hmang ve thin.

Chutih hun laia ka rilru tinatu chu Zo khaw lam aṭanga lo kal vawkte zawng, âr zawng, zu zawng intihlal tumte’n mahni duhzâwng an rawn **order** a, kan ringthar naupang leh tlangval, puitling pawh an tir kat dâwr dâwr a. Hetia lo kalte hi an vai chuan an sual vek lo; min rawn puih tumtu leh puitu pawh an awm tho. Pathianni min hmanpuitu pawh an awm ve tho va. A ṭha lovate thil rawn tih (awmdan) khan ringtharte a **titlu** leh tlat si thin a ni. Mizo, Kristian ni si nun ṭha si lote thiltih tak mai kha ka rilru tinatu, pawl lutuk êm êm mai chu a ni a. I rilru pawh a tina ve ngei ang. Kan rawngbawlina Home Mission-ah pawh, khawiah pawh,

buh hmun ațanga tlaivara țăwnğtai țin, sakhaw dang - Hindu, Muslim, etc. kâra Lalpa ram lâk zêl tuma beitu, Kohhran hminga che chhuak zawng zawngte tân *‘Tițiautu tenawm’* a tling si a!

Hawh u, rawngbawla feh chhuak ve lote pawh hian kan awmna Kohhran țeuh ațang hian țăwnğtai leh thilpêkin țin lo la ve sauh sauh teh ang u khai. Thil dang ti pah leh sumdawnga an khuua kalte pawhin

Krista Chanchin Tha nena inmawi nun keng tel țeuh ila, ringtharte’n nun tak tak, nun hlun an lo neih theih nan kan vai hian NUN KRISTA hi a taka lantir i tum țeuh ang u aw. *‘Tichhetu’* ni lovin *‘a chhe lai siam țăatu’* nih tum țeuh ila. Tichuan ‘Buh hmuna’ rim taka thawktute kan ținpui a lo ni mai bawkw dawn a ni. I awmdan chu Krista Chanchin Tha nen inmawi phawt rawh se, Amen.

BANGLADESH-AH PATHIAN TIHDAMNA ROPUI

B.Lalremtluangi
Bawngkawwn

30th Sept-19th Oct, 2010 chung hian Bangladesh-a Kristian-te kan Mizo hnahtlak Bawm, Evangelical Christian Church (E.C.C) hoten min sawmna angin kan kal a. Heng Kohhranah te hian Rawngbawlina kan nei a ni.

- | | | |
|---------------|---------------|-----------|
| (1) Zion Ruma | (2) Bethel | (3) Laimi |
| (4) Suanlu | (5) Bandarban | (6) Daka |

Dt.4th Oct 2010 ațangin Tihdam Rawngbawlina kan țin a, khaw hrang hrang ațangin an lo kal tam hle, an rawn inzawn lut zut zut a. Nl.Rawnkim, mitdel chu chawplehchilhin a mit a rawn

vâr ta nghal a, “Engkim ka hmu thei vek tawh,” a ti a, lawm avanga țăp thawm leh Haleluiah a ri chuah chuah mai! Nula pakhat kum 3 school pawh lo chawl tawh, zeng natna vei pawh Pathian

tihdamna changin, a han kal leh ta mai a. Nu leh pa nei tawh lo a ni a, a lungchhia a ðap nasa hle. A tukah chuan Nikeli, kum 12 ðawngtheilo chu Pathian tihdamna changin a rawn ðawng thei leh ta mai bawk a, a ropui hle.

Ni thumnaah Lalpa hnathawh mak tak a lo thleng leh ta. Achophra Marma, Buddhist kum 62, kum 10 zeng tawh, Vellore-ah pawh an hruai tawh a, mahse a ke pakhat mah a che thei chuang lo. A Teak huan zawng zawng hralh zova, cheng nuaih sawm chuang lai seng ral tawh chu motor-in an rawn phur a. Rawngbawlsak a nih hnuah, chawplehchilhin damna a chang nghal. Ruma Bazarah mi tam lai takin, “Ka dam ta, Kristian nuin min ðawngt'ai a, min khawih bawk a,” tiin a au vak vak a, mipuiin mak tiin an bawr nasa hle. Zengpa damnaah hian harsatna kan tâwk ðan ta a, “A tidamtu che chu ramhuai a ni ang, a *power* a chak êm mai. Khawih mah ula, a taksa zawng zawng a nê'm vek ang,” an ti a, a tukah chuan mipui tam takin min khawih tumin min bawr ta luai luai mai a, a manganthlak hle mai. Piantirh aţanga bengngawng engemaw zatin damna an chang bawk. Tichuan Bethel lam panin kan pheih leh ta a.

Bethel-ah hian E.C.C Biakinah rawngbawlina kan nei leh a, mipui tam tak khaw thenawm aţangin an lo kal a, zeng an rawn zawn luh tam tak kein an hâwng a. He khuaah hian ðawngtheilo bengngawng bawk, tlangval pakhatin damna a chang nghal bawk a, a lawm lutuk a ðap reng mai a ni.

Mawk Hindu nu Vanneihching chu a nau neihna aţangin a damlo vak a, a ðawng thei ta lova. Rawngbawlina kan lo zo tawh si Duty-te', “Rawngbawltuin kan khua a la chhuahsan chuang lova, thu awih takin lo inkhawm ve zel la, i ðawng thei mai ang,” an ti a. Pu R. Vanlalzauva thusawi a ngaithla a, a zanah chuan a lo ðawng thei ta nghal a ni.

Damlo tam tak an rawn zawn luh kein an hâwng lai han hmuh chuan, Lalpa hi a-hring-a-hrânin a rawn inlar ta ni berin a lang. Nula pakhat ðawngtheilo pawh a ðawng thei ta si a, pawna a pheikhaw dah a lo bo a. A nuin, “A paw lo, i ðawng thei tawh tho a, i pheikhaw chu bo mai mai rawh se,” tiin pheikhaw bun lovin, ni sa hnuaiah an haw ta ðauh ðauh mai a ni. Pitar

pahnih, hun rei tak ding thei tawh lo, thu ringawt thin chu kein tha takin an kal thei nghal ta bawk.

Laimi khuaah kan insawn leh a, mihring an lo kal tam lehzual a, kan invêng sêng lo a ni ber mai. Ni tin sâng têt an lo kal a, *ticket* nei chung pawhin khawih hmasak inchuhin an innêk buai nasa hle. Mi â an rawn hruai tam hle a. Bangladesh ram khaw tin aṭangin mihring an rawn fuankhawm a ni ber mai. Thingkunga nilenga an phuar beh tlatte chu, ṭawngṭaisak an nih hnuah chawplehchilhin, “A! Ka fing ta,” an rawn ti a, a ṭhen chu an ṭap zawih zawih a, Tv. Rualnun, kum 20, a thlen veleh a fin nghal thu a pain a rawn sawi a, lawmthusawi nan Rs.200 min rawn pe nghe nghe a ni. Buddhist Puithiam mi â an rawn hruai chu khawih lai pawhin a zung tur tur a; a bân a zeng vek a, a mitin khua a hmu tha lo bawk. Rawngbawlsak a nih hnuah a pumin a dam vek a, a lo fing nghal bawk a. A nu lawm lutukin khaw hrana ka awm tawh min rawn zawng zel a, T o w e l , A g a r b a t i , Mombati, Sahbon leh Tooth

Brush te min rawn pe a. A fapa chu a têt lai aṭanga rualbanlo a nih thu te, damna an duh avanga Puithiam a dah thu te, Kristiana awm nghal pawh an hreh loh thu te a rawn sawi a ni.

Ruangsurī(Suanlu)-ah kan kal leh a, damna lo chang tawh te’n an lo in-phone kual vek tawh avangin, zing dar 5 aṭangin mipui an lo pung khawm a, indan sên a ni tawh lo; sâng têt an lo kal a, an rawn inzâwn zut zut a. Police hotute pawh lo kalin, a remchâng chângah an lo duty ve ta sung sung a. Ticket chang lo mi tam tak pawna mite chu rawngbawl na neih hmasak an ni ta a. A ruala ṭawngṭaina (*mass prayer*) neih hmasak an ni a; zeng an rawn zawn luhte chu an kal thei ta nghal a, boruak a sâng thei hle. An hmuh lai ngei a zeng an zâwn kein an kal thei ta mai chu mak an ti hle mai. Nu pkhat pawhin a zâwn tute a kalsan vek a, Bazar Ruangsurī, mi tamna lai berah a han kal a. Bazar-a mi zawng zawngin an thil zawrh kalsana rawngbawl na lam an pan tak tak mai chu, kan phêk buai zo ta. Hemi ni hian mi sangthum chuang ṭawngṭaisak an ni. Damna chang tam tak zingah a

langsar zual chauh târlang ila: Naupang kum khat leh a chanve vel, mawngping an zai tawh lo ping leh, tuiril chauh chhuak thei tâwk tâwk chu, a lo âwng zau leh ta a; mitdel tam tak, meng reng si, hmu miah lo an tam êm êm a, mitvâr an tam hle. Kum 15 hnuai lam sazu tawi lip thei lo an tam khawp mai a, tawngtai chungin kan pawt a, an phu tâwk ang zelin a lo seiin a lo lian ta thin a, a inlip thei nghal vek zel bawk a. Tilpuk lian pui puite pawh a han thêp suai suai mai chu, Pathian hi kan hnenah a va awm chiang tak êm! Naupang khawngaihthlak tak, kum 2 mi an rawn hruai chu serh a nei lo tlat mai a, a zunna tûr tlem a bawk lel a, a dang zawng chu a mam vek a, a hmel enin hmeichhia tûr a nih rin a ni. Ka kut zung chalin ka'n nem vak a, a rawn pawp têp a, mahse Pathian thu a lo thleng ta tlat mai, "I nem zel chuan a pawp thei ngei ang a, mahse thisen a lo chhuak ang a, ringlomi an ni si a, an tibuai ang che, duh tâwk rawh," tih ka thinlungah chiang takin a lo lang ta a. Doctor hnena kal zâwk turin ka rawn ta a ni, vawi khat mah doctor an la entir lo lehngal. Pa pakhat an rawn

hruai chu, a mar ka hmu zo tlat lo mai a, engmah an sawi bik loh avangin hre lo angin ka awm ve ta mai a, case siam thei, min enthla rengtu an awm avangin ka kaltir thuai a, kawngah a thi tih an puang ve ta zâwk a.

Nu pakhat thi tawh pawh an rawn zawn a, kan lo bâng hman chiah a. Duty-te'n an lo hawtir ta zawk a. Kan Pathian thiltihtheihna an rinzia chu mitthi te pawh an rawn hruai duh a ni. He khuaah hian Pathian hnathawh a ropui hle a, kan sawi vek sêng lo ang. Kan thlen zan aţangin duty insiamin, kan riaha min vêng tlaivar thak thin a ni.

Bandarban District khawpuiah zing chaw ei tumin kan pan leh ta a. Kan Mizopa Pu Zama, Bandarban District pumpuia ex-Chairman lo ni tawh ina chaw ei a, hahchawl tûrin kan pan a. Minister, MP, Chairman, an Lal (King, Raja), mi tlem tê tawngtaina nei tûra zing dar 10-a an in kan thleng chu, tual zawng zawngah mipui an lo khat vek a, Baptist Biakinah rawngbawlna nei turin kan pan leh ta tawp zâwk a ni.

Mipui tam lutuk vangin kan ti hlei thei lova, an MP

Bimbahadur, kum 23 MP, Minister of State ni bawk chu intawngtair tûra lo kal vein, an chairman hote chuan mipui chu an lo *line*-tir ve mek bawk a. Anni tel lo se, buaina lian tham a thleng ngei ang. Buddhist-ho king te pawhin an Lalnu, zeng an rawn hruai a, chawplehchilhin a kal thei nghal a. A tawpah phei chuan kan hun neihin min daih tawh si lova, mipui an la tam si, a chhuah theih si loh, room pakhtah min thukru ta ringawt a. Hmai lang lovin puanin min tuam tlat a, rei fe hnuah kan chhuak thei tawk a ni; mipui erawh an haw duh chuang lo.

Hindu, Buddhist, Muslim hoin an puithiamte hnenah heti hian an ti a, “Kristiante Pathian chuan damdawi tel lo, dawî pawh ni lo, minute khat chhung lekin damlo tam tak min tidam a. Pathian hnenah damna duhin pawisa te, ei tûr te tam tak kan pe che u a, damna min pe ve thei si lo,” tiin nasa takin thuthang a awm a. Pathian hnathawh a nasat êm avangin Sorkar lam beng a lo thleng a; zan dar 12 thleng te’n CID-te’n kan thlennaah min rawn luhchilh

a, kan nupain CID Office-ah te min ko a, kan hruaitute phei chu wawî engemawzat police-te’n an ko a, case an siamsak têt a, a chhan chu an ram mipui zawng zawngin min bawr si a; kan permit leh kan hnathawh a inmil lo ti tein sawiselna tûr an zawng char char a. Mahse Lalpan an thinlung a tinêm a, a tawpah CID Officer, DSP te chuan an nate an sawi a, kan tawngtaisak ta zawk a ni. MP hian kumtharah amah leh a thawpuite’n lo buaipui tûrin min sawm leh a ni.

LALPA Ropui ber rawh se.

Damna langsar zualte:

1. Mitdel mit vâr nghal - 159
2. Bengngawng hre nghal - 189
3. Tawngtheilo tawng theinghal-25
4. Zeng kal thei nghal - 25
5. Tilpuk - thêp zat - 9
6. Sinus damna chang nghal- 31
7. Mipa serh tawi, sei nghal -11
8. Mawng ping, âwng nghal -1
9. Mi â, fîng nghal -7
10. Bâwk, keh nghal -20

Hmun hrang hranga min lo tawngtaipui thintute zawng zawng Lalpan malsawm vek che u rawh se.

CHANCHIN ȚHA KAWLTU RAM AN LO THLENG TA SI A!

*Upa Rochhunga,
Hualngohmun*

Kan hriat angin Mizoram chu India State zinga ralmuang ber, Kristian ram, hmasawna lam pana kal mêk a ni a; tin, a ram boruak a Țhain a nuam a; thlai chi hrang hrang, zo leh phaia chîn chite pawh hi a Țha duh vek emaw tih mai tûr a ni. Grep chenin a Țha fu zel mai. Van ruahtui thlengin a la thianghlim fu a ni. Hei vang pawh hi a ni mahna, India ram chauh pawh ni lo, khawvel lehlam mite nen lam Mizoram hi hmuh an châk ve ta. Mi chi hrang hrang an lo lût mêk zel a, an la tam chho zel tûra ngaih tûr a ni ang. A tam ber chu ‘pawisa’ duh vanga lo lût an ni ang a; tin, a ram boruak nuam leh zo thlifim lêng velte pawh hi dawn ve an duh pawh ni fa hmiang.

Mizoram chu Kristian ram, Chanchin Țha kawltu ram kan ni. Hnam dang kan tih lo lût mêkte hi kan neih leh kan kawl mêk Chanchin Țha dawn beiseia lo kal chu sawi tûr an vâng hle mai âwm e. Masihi Sangati Kendra lamin an record (August, 2010) dan chuan hnamdang, ‘Vai’ kan tihho hi 13,989 an ni a. Sawrkar lamin a hriat dan erawh hei aia sâng hi niin a lang. Hengho hi a tlangpuiin Hindu leh Muslim sakhaw zuitute an ni ber. Hengho hian an mamawh ber nia an hriat chu ‘pawisa’ a ni, ti ila a sual tam lo mai thei e. Hetih lai hian keini Mizo, a ram neitute hi chu Chanchin Țha tihên,

Chanchin Țha kawltute kan lo ni si a. An nunin a mamawh ber chu anmahni aiin kan hriatsak zawk, chu chu Chanchin Țha hi a ni si. Hei hi kan hriat avang pawhin Kohhranho pawhin kan vei a, “Engtin nge hma nasa zâwkin kan lâk ang?” tih hi Kohhranho rilru kâng mêktu chu a ni.

Hmathlir a fiah zâwk theih nan Gospel Messenger Team-te rawngbawl dan tlêm tê chauh i’n târlang lawk teh ang. Chhimphei Presbytery huam chhungah tun kum sawm (10) ral taah khan Aizawl to Lunglei kawngpui ‘National Highway’ sialtu Company pali - B.E.L;

R.B.M Tantia, Jt, Venture; R.C.C leh V.E.L Company-te bâkah State Referral Hospital Building satute kum sawm dawn hna rawn thawk an rawn inbun fel ta tihah anmahni lo lawma lo hmelhriat tûrin Team-in an va tlawh chhuak a. An hotu liante kawmin '*fellowship*' neih ho puiah an va sawm a. Mi changkâng leh mi thiam an nih avangin gentleman taka lo dawngsawngin programme mumal tak an lo siampui a. "Keini chu Lal Isua ringtu kan ni a, kan rin Lal Isua hian a chanchin la hre lote hnena hrilh chhawng zêl tûria thu min pêk avangin Chanchin Ṭha hi kan sawi lo thei dawn lo a nia. A duhin in awih ang a, a duh lo chuan in awih lovang, nangmahni thu thu a ni ang," tiin tlang takin an hrilh nghal mai zel a. Tin, a duhte'n an dawn tûrin Bible leh Gospel Tract-te an sem bawh ṭhin. Mizoramah mikhual an nih avang pawh a niang, an khua pawh a har ve ni fa hmiang, *po-lite* leh *gentleman* takin, "Lo kal leh ngei ang che u," tia min sawmzui lo an awm ngai lo. "Vawi hnih vawi thum an hmunpuia Gospel Crusade kan neih hnu chuan an labour Camp-

ah duh hun hun leh remchan hun apiangah Gospel Crusade kan nei tawh mai ṭhin a ni," an ti. Mi engemaw zât Lal Isua hnenah hruai thlengin, missionary-ah pawh Bible an zirtir hnuah mi pali chuan an ram an pan ta.

Heti zâwng hian thlir zui ta ila: (1) Mizoram hi hnamdangte huap bikin Mission Field pakhatah puan ve ni ta se. Heng Home Mission North & South leh Masihi Sangati te huap vekin Director/Field Secretary-in awp ta se.

(2) Gospel Team kan neih mêk Bru-Chakma Gospel Team, North leh South leh Mission Gospel Team te hi Category khatah dahin a ṭul anga tihlen ni thei ta se.

(3) Vai, hnam changkang leh dinhmun sângte tân English Congregation kan neih ang deuh hian Hindi-in buatsaihve ni ta se. Lal Isua la hre lo, mi heti zozai Mizoram, Chanchin Ṭha kawltu rama lo lutte hi Mizoramin kan neih hlu ber 'Chanchin Ṭha' hawntir hi Kohhran leh ringtu mimal mawhphurhna a ni. Chanchin Ṭha kawltu ram an lo thleng a, Chanchin Ṭha hi an hâwn tûr a ni.

RAMTHAR FIELD TLAWH REPORT

1. Field hming : Barak Area Field
2. Khua/Mission Centre : Jarultola
3. Tlawh hun chhung : 21-25, June, 2010
4. Tlawhtu Kohhran : Bethlehem Vanglai Koh. Ramthar Comt.
5. Kal zât : Mipa : 16, Hmeichhia : 2, Total : 18.
6. Tlawh chhan : Work Camp.
7. Hnathawh/thil tih : Missionary Nurse Qtrs. chhuat, pindan bang, electric fit, etc.
8. Senso zat : Rs 25,976/-
9. Lawmawm lam : Pathian kaihhruaina zarah kan thawh tûrte tluang takin kan thawk zo thei a, Kohhran mipuite min tawmawmnaah lawmna tam tak kan nei a ni.

Tui a tam, mahse, in tlâk a awm si lo. Chhuan sova in tlâk chauh a ni a; chhuan sovin a dai lawk thin si lo. Chutih laiin ruah a rawn sur a, tui in tûr kan ngah ta, kan lawm hle.

10. Report tul dang : He lai hmunah hian Kristian an la tlêm êm êm a, Hindu tamna a ni a. Hindu-hovin an duh tâwk tâwka aurinna an hman thin laiin Kristiante'n an tihrik ve hlekin an ngai thei lo hle zel. Helai hmun hi Meitei-ho awmna a ni a. Thawktu Missionary Nurse Zarzokimi leh helai hmuna Kristiante hian tawngtaipui an mamawh hle.

Report petu,

Sd/-
Vanlalmuana.

1. **Field hming** : Home Mission South
2. **Khua** : Damdep I
3. **Tlawh hun chhung** : Ni 22-30 March, 2010.
4. **Tlawhtu Kohhran** : Ramthar Comt. Venghnuai Presby. Kohhran
5. **Kal zat** : Mi 18.
6. **Senso zat** : Rs 60,000/- (chuang deuh)
7. **Tlawh chhan** : Work Camp
8. **Hnathawh/Thil tih** : Type III Qtrs. sak

9. Lawmawm lam : Hmanruain a daih chin chu kan hna tluang takin kan zo thei a, a lawmawm hle. Ni 28.3. '10 (Pathianni) Tumkau ni denchhenin Damdep I-a Kristian service hmasa ber chu Bazar hmunah kan nei thei a. Tumkau vaiin kawng kan zawh zui bawk a. Chakma țawngin "Lalpa hminga Lal lo kal chu fakin awm rawh se; Chungnungberah khian Hossanna," tiin kan au rual a, anmahni țawngin hla kan sa bawk a; hnuk a ulh țeuh mai. Kawng zawhnaa tel Chakma naupang 53 leh puitling 3 te nen Quarters sak tharah chawhlui kan kil ho va, kan hlim hle. Good Friday laiin Chakma naupang 13-in baptism an chang a, kan lawm takzet bawk.

10. Lawmawm lo lam : Damdep I-ah hian tui a harsa a, an tui neih chhun lah a thianghlim tâwk lo niin a lang a; chuang chu a ni mai thei, malaria a tam a, hmun hrisel lo tak a ni. A bul hnai khuate Kristian awm tawh vek ni si, Damdep I, in 200 dawn lai awmnaah hian Kristian pakhat mah an awm lo hi a mak hle. Chuvingin Mission din hi Kohhran tih tûr dik tak a ni.

11. Report țul dang : Damdep I-ah hian thawktu 6 an awm a. Sikulah Class III thleng an hawng a, kum tharah chuan Class IV hawn belh beisei a ni. Pu HC Vanlalruata'n a Generator min hawhtir chu ênga chhitah leh hnathawh nan kan hman țangkai hle. Hei hi keng lo ila hna kan thawk thei lo hial âwm e.

Report petu,
Vanlalchhuanga
Secretary,
Ramthar Comt., Venghnuai Kohhran.

1. Field hming : Jharkhand Field
2. Khua/Mission Centre : Dumka
3. Tlawh hun chhung : Ni 16-24. 11. 2010
4. Tlawhtu : Ramthar Committee, Kolasib
Hmar Veng Kohhran
5. Kal zat : Mipa - 12 Hmeichhia - 6 Total - 18.
6. Tlawh chhan : Ramthar Field tul dan leh
pawimawhna a hmun ngeia hmuh
7. Senso zat : Rs 67,606/-
8. Lawmawm lam : Thawktute kawng hrang hrangah
an inpekna leh thahnemngaihnaah an fakawm a, kan tlawh kualna
zawng zawngah te a tul apiangah tihdante min hrilhin hma min
hruaisak a, kan lawm hle a ni.

Tin, Bialtu Pastor H. Lalianzara hova kal kan ni a; ani hi kan zuk kalnaa Pastor hmasa ber a ni a. Jharkhand Field-a thawktute leh ringtharte pawhin an lo lawm hle a. A hnug zui a nuamin khu lama thawktute leh ringtharte nen pawh kan innelin, kan inpawh phah hle a ni.

10. Report tul dang : Kan zuk kalnaah hian Fellowship hrang hrang 12-ah sana, Biak Ina tar tar leh Rs 1,000/- den den kan pe. Tin, Field Office leh Pastor Quarters 3-a tar tarin sana kan pe bawk.

Report petu
Lalfamkima
Secretary,
Ramthar Committee,
Kolasib Hmar Veng Kohhran.

1. **Field hming** : Tripura Mission Field
2. **Khua** : Pakhipara, Ganganagar Pastor Bial
3. **Tlawh hun** : Nov. 15-19, 2010
4. **Tlawhtu** : Ramthar Comt. Kolasib Diakkawn Kohhran
5. **Kal zat** : Mipa - 13.
6. **Tlawh chhan** : Work Camp - Evangelist Qtrs. sak
7. **Senso zat** : Rs 49,034/-
8. **Hnathawh/thiltih** : Kohhran tlawh
9. **Lawmawm lam** : Evan. Tv. Lalmalsawma bâkah Bialtu Pastor P.C Lalmuanawma te, Evan. Lalremliana te, Evan. Donvanlian Kaipeng te nen inpawh takin kan thawk hova; tisa leh thlarau lamah hlawkna kan hmu a, kan lawm hle
10. **Lawmawm lo lam** : Pathian khawngaihna zarah harsatna kan tâwk lo. Lalpa ropui rawh se.
11. **Report tul dang** : Quarters sak hi a lenzawng 24'x14' a ni a; tha tak leh mawi takin Pathian hruainain kan sa zo thei a, kan lawm hle a ni. Biak In hi an la nei lo a ni.

Report petu,
R. Thanzuala
Secretary,
Ramthar Committee,
Diakkawn Kohhran

- | | |
|---------------------------|--|
| 1. Field hming | : Assam Mission Field |
| 2. Khua/Mission centre | : Guwahati, Bairabkunda |
| 3. Tlawh hun chhung | : Dt. 17-23.11.2010 |
| 4. Tlawhtu Kohhran hming | : Ramhlun Kohhran |
| 5. Kal zât | : Mipa: 4 Hmeichhia: 2 |
| Total: 6 | |
| 6. Tlawh chhan | : Field visit |
| 7. Senso zât | : Rs 57,400/- |
| 8. Lawmawm lam | : Thawktute thahnemngaihna leh
inpêkna a nasa a, an bula awm a nuam |
| 9. Report tul dang | : Hetiang hian tanpuina kan pe: 1)
Chiring Chapori Fellowship Biak In thutthleng siam nan Rs 8,000/-
2) Supangaon Biak In thutthleng leh music instrument Rs 14,000/-
3) Guwahati Fellowship Pulpit siamna senso leh ventilation
siamna Rs 8,000/-
4) Mikhual puanthuah (Field Hqs.) mattress & Bed Sheet Rs
5,000/- |
| Total: Rs 35,000/- | |

Report petu:
Sd-
Lalsiliana
Team Leader

1. **Field hming** : Karbi Anglong Mission Field
 2. **Khua/Mission centre** : Pastor Bial pasarih (7)
 3. **Tlawh hun chhung** : Dt. 17-22.11.2010
 4. **Tlawhtu Kohhran** : Presbyterian Kohhran, Ramhlun, Aizawl
 5. **Kal zât** : Mipa: 9 Hmeichhia: 4 Total: 13
 6. **Tlawh chhan** : Field Post hrang hrang hmu tûrin
 7. **Senso zât** : Rs 12,700/-
 8. **Lawmawm lam** : Thawktute inpêkna a sang a, ringtharte hmel hmuh a nuam. Kohhran leh fellowship member-te an nghet a, an ti tak tak hle a ni.
 9. **Lawmawm lo lam** : Kohhran thenkhatte an changtlung hle a, School leh Biak In an neih that hle lain, thenkhat Biak in chhe tak, thutthleng leh bungrua pawh nei lo an ni hi tun aia khairual deuhva hma lâk ni se a tha hle.
- Report tul dang** : Kan Synod Field-a senior ber pawl an ni a, an bul vela Hindu sakhua in hma an la nasa ve a; ringthar tihduhdah tuar te leh nu leh pa hnawhchhuah te lo ngaihsak a, hmuhsitawma an awm lohna tûra lo tuamhlawm a, an mamawh lo ngaihtuah thuai thuai hi a tul a, tan lâk deuh ni se. Hetianga kan ngaihsak theih loh chuan mi sakhaw awm tha lai hi sâwm pên tâlh a tul em ni? Rethei tûr ngawr ngawra Kristian nih hi thil harsa a ni

Report petu:

Sd-

C. Zaihnauna,
Asst. Secretary
Ramthar Comt.,
Ramhlun Kohhran

CAMBODIA LAM VE THUNG AW

**Rev. Vanlalrema,
Luangmual Vengthlang**

Kum zabi kuana ațanga sawmpathum lai khan Khmer Empire ropui tak a lo ding tawh a. Chu lalram chu kum zabi 14-naah a tlu chhe ta a. A hnuah lalram te reuh tē tēa inthenin kum zabi 18-na lai vel khan, French awpna hnuaiah Campuchia (Cambodia) chu a lo ding ta a.

Kum 1953-ah French lak ațanga indangin King Sihanouk-a hnuaiah Independence-in a awm ta a ni. King Sihanouk-a hi kum 17 chhung a lal a; General Lon Nol-a'n sipai chakna hmangin a paih thla a, sawrkar ngheet a ding thei ta lo. Khmer Rouge-ho an lo lian a, tualchhung indona a lo chhuak ta a. Kum 1975-ah Communist Khmer Rouge-te chuan Phnom Penh an la a; mi maktaduai khat aia tam an that a; sipai officer te, sawrkar hnathawk te, mifingte leh lehkhathiam te, sakhaw hruaitute leh sawrkar hmasaa mi pawimawh zawng zawngte an thah chimih vek avangin Cambodia mipui 7 zela 1 vel thi ang an ni. Khmer Rouge kuta thi leh hri avanga thi zawng zawng chu maktaduai khat leh nuai sarih vel nia chhūt a ni. Kum 25 lai tualchhung indona avanga hrehawmna chu kum 1999-ah a lo reh ta chauh a. He indo buaina

avangin nasa takin an ram a tlachhia a, Dan pawisak lohna te, eirūkna sual te leh retheihna te chuan an ramah bu a khuar a, an chhungril nun a ruak a, a ruin nun tuihalna an nei nasa êm êm a ni.

Cambodia hi 180,000 Sq.Km vela zau a ni a; kum 2005 chhiarpuiah khan mihring 13,607,069 an awm a; mihring zawng zawng zâtve vel hi 1985 hnu lama piang an ni a; 35% hi kum 14 hnuaialam an ni. Hnam hrang hrang an awm a, ramhuaibia te pawh an awm.

Hriselna chungchangah chuan Cambodia mite hi thianghlimna leh hriselna chungchangah an hniam êm êm a. U.N report ang chuan mi maktaduai khat zelah Doctor 16 awm ang an ni. WHO-in survey a tihtir a an hmuh dan chuan Cambodian puitling za zela 75 chu thin thâwng thut avanga rilru lam kim lohna nei an ni. Aid Worker-te chuan thalai 40% chu

khawtlang nuna manganna leh harsatna thleng thin avanga rilru lama harsatna nei niin an hre bawk. Chutiang an nih laiin an ram pum puiah Mental Hospital pakhat leh Psychiatrist 20 chauh an awmin an sawi bawk si.

Tin, U.S Department of State chuan Cambodia hi mipat hmeichhiatna lam leh chhawrluih sal atana hmeichhia leh naupangte hralh rûkna ram niin an sawi. Zirna lamah an hniam êm êm a, an *literacy rate* chu 37% chauh a ni. Tin, Cambodia-ah hian hmeithai an tam êm êm bawk.

Tin, pianphung leh kimtlângah chuan Mizote nen kan inang êm êm a; len lamah pawh kan intiat tlâng hle. “Inbiak sual a awl hle a, anmahni mite pawhin min biak sual châng an nei thin,” kan missionary-te pawhin an ti a ni. Kan hnam nun leh ziarâng pawh a lo inang thui hle niin an sawi bawk.

Tin, Cambodia sawrkar chuan Buddhism chu an sakhua atan an pawm a, an Constitution tharin sakhaw zalenna a pêk avangin sakhaw danga inleh a khap lêm lo. Mahse an sakhaw zirtirna chuan an ram leh hnam hliam tuarna ata thlamuanna leh hlimna a pe thei lo va; mi tam tak nun leh

rilru chuan chawlhna a zawng a, khawvel nawmsipbawlnaah an tlan a; mahse chawlhna an va hmu chuang lo. An nunin **âr bo** a zawng tak meuh a ni. Chutih lai taka an mamawh dik tak chawlhna leh muanna kim neitu LAL ISUA CHANCHIN THA HRILH hi a hun lai tak niin a lang.

Krista pasaltha engemaw zat chu Pathian chakna rinchanin an pên lût mêk a. South East Asia huam chung ram hrang hrangah Chanchin Tha hril tûrin Kohhran thenkhat leh Para Church thenkhatte’ n tan an la mêk bawk a ni. Hla siamtu sawi angin, “Isua hming an hril ang, Halleluiah; Hetah (Mizoramah) Gospel a thleng ta,...Chhak lamah a kal zel ang, Halleluiah!” tiin khawchhak lam an hawi tan ta. Kan ram chungah hmelmapha hian sual tinreng hmangin min tibuai mah sela, i kal zel ang u aw, Zionfate,...kan hmaa mi huai tam tak din nghehna hmunah hian zâm lovin, kawlkil thlenga thuhretuah i tan ve ang u.

Tunah hian South East Asia ram hrang hranga Chanchin Tha hril tûrin kan thalai lehkhia thiam sângte leh sâng vak lote pawh, mahni inphat ngam khawpa kohna

hriate tân Lalpa'n kawng a hawng mêk. Zawlni Isaia'n "*I puan in hmun chu zauh rawh; a khuhna pawh tihlai ang che, ren suh; a thlunna hruite chu tisei la, a kaih marna khente pawh tinghet sauh rawh, i ramri chu dinglam leh veilamah i zauh dawn si a,*" (Isa. 54:1,2) a tih angin (kan Synod pawh hian) ramri zauh zel a hun ta hle mai.

Tunah hian SEAMS kal tlangin Missionary - Cambodia-ah 7; China-ah 5; Thailand-ah 2 - an thawk mêk a. Nangmah i kal thei lo a nih pawhin tawngtaina leh thilpêk talin i kal ve dawn lo'm ni? Kohna hria leh ngaihven duhte tân Fatu hna lo thawk tûrin South East Asia Mission Society (SEAMS) pawh a inring reng e.

RAWNGBAWL NANA THILPEK PETUTE (*Chhunzawmna*)

1. *Zarkawt Kohhran Ramthar Commt.* - Siluguri Field-a Jaigaon Medical Clinic sak nan - Rs 40,000.00
2. *Baktawng Pastor Bial Koh. Hmeichhia* - Jharkhand Field-a Dumka Bialin a tûl apianga an hman a tan - Rs 5,000.00
3. *Republic Veng Pastor Bial Koh. Hmeichhia* - Teirei Forest Biak In leh tûthtleng siam nan - Rs 57,700.00
4. *Pu B.Lianthanga, Republic Veng, Aizl* - Assam Mission Field-a tûl apianga hman atan - Rs 1,000.00
5. *Electric Veng Koh. Aizawl* - (1) Arunachal 'W' Field Itanagar Biak In tûthtleng siam nan - Rs 20,000.00
(2) Barak Area Kabuganj Bial Singerbond-a thawktu hman tûr Plastic tuizem leina - Rs 4,000.00
6. *Chaltlang 'S' Koh. Ramthar Comt.* - Barak Area-a Lalang Biak In sak nan - Rs 28,710.00
7. *Dr. Saihlira te nupa, Dawrpui V.T (Inneih Silver Jubilee lawm nan)* - Nepal Field-a Bharatpur Kohhranin a tûl apianga hman a tan - Rs 2,000.00
8. *Mission Veng Kohhran* - Rev. Somlal Soren (L) fapa damlo tãnpui nan - Rs 40,000.00
9. *Thenzawl Field Veng Koh.* - (1) Arunachal 'E' Field-a New Changpu Biak In sak nan - Rs 10,000.00
(2) Arunachal 'E' Field-a Miao kohhran Biak In sak nan

- Rs 10,000.00
10. *Dintha Koh. Hmeichhia* - Nepal Field Bharatpur Biala
Hmeithai pitar 2 in chung tûr rangva lei nan - Rs 10,000.00
11. *Republic Veng Koh.* - (1) Home Mission 'S'-a mamawh lei nan
- Rs 5,000.00
- (2) Barak Area-a Manuikbond Biala Biak In sak nan
- Rs 10,000.00
- (3) Rev. Somlal Soren (L) fapa damlo tanpui nan
- Rs 5,000.00
12. *Chhiahtlang Pastor Bial* - A tûl apianga hman atan
- Rs 3,700.00
13. *Laipuitlang Koh. Ramthar Comt.* - (1) Home Mission 'S'
Damdep I kohhran tan - Vai khuang - 1
- (2) Karbi Field Koilamati Bial-a Bethel Kohhan Biak In
thutthleng siam nan - Rs 7,000.00
- (3) Rev. Somlal Soren (L) fapa damlo tanpui nan
- Rs 10,052.00
14. *Shillong Mizo Kohhran* - (1) Home Mission 'N' Tuipuibari II
Biak In sak nan - Rs 10,000.00
- (2) Karbi Anglong Field-a Borjan Biak In sak nan
- Rs 20,000.00
15. *Police Veng Koh. Ramthar Comt., Keifang* - Tripura Field
Karbook Biala Mantarai Koh. Biak In sak nan - Rs 5,000.00
16. *Bethlehem Koh. Ramthar Comt.* - Karbi Field-a Sarihajan Biak
In sak nan - Rs 100,000.00
17. *Khawruhlian Pastor Bial* - Tripura Field Birhanganj Adibasi
Colony Koh. Udaipur Bial, Tripura South - Rs 10,000.00
18. *Lungleng Kohhran* - Home Mission 'S'-a mamawhtute tan
- Khuang lian - 1, khuang te - 1
19. *Kolasib College Veng Koh.* - Karbi Field Koilamati Biala
Chekso Biak In sak nan - Rs 10,000.00
20. *Lalpa Hmangaihte, Ramhlun 'S', Aizl* - Tripura Field Bironjoy
para Evan. Lalhmingmawia hlawh tûr (July - Sept. 2010)
- Rs 19,500.00

SYNOD BOOKROOM BOOK NEWS

1. Chicken Soup for Parent's Soul :

Chicken Soup for the Soul bu thar ber a lo chhuak leh ta. Tun tum chu nu leh pa leh fate inkungkaihna lam a ni ve thung. Chhiar la, chhungkaw inkungkaihna tha neih dan a kawhhmuh thei che a, chhungkaw ngaihawm tak a siamsak thei ang che. Dr. Rualthankhuma lehlín bawk. Rs. 130 man a nie.

2. Ralna thing : Mihring hlui ralna

lehkhabu; 'Ngaihsak ka ni em?' tih ni lovin, 'Mi ka ngaihsak em?' 'Hriatthiam ka ni em?' ni lovin 'Mi ka hrethiam em?' 'Hmangaih ka ni em?' ni lovin 'Mi ka hmangaih em?' 'Miin min fak se' ni lovin 'Mi ka chawimawi em?' Mahni duh zawng leh tha tih zawng ni lova Lalpa duh zawng zir tura mahni ral theihna bu, Rengpuí buatsaih hi Rs. 100/- man a ni.

3. Kum 6 sulhnu : He kum 6 sulhnu hi

Revd Chuauthuama, Didakhe Editor a nih chhunga Editorial a ziaak te an ni hlawm a. Chu bâkah, Bible Study thu tlem azawng a tel bawk. Editorial thenkhat chu hlutna nei zui vak lo tûr an nih laiin a thehte erawh thu hlu tak leh bengvarthlâk tak an tling. A bu a tê na vang vangin hriatna lam pûr châwkna tha tak chu a tling phawt ang le. A man Rs. 80 a nie.

Postal Regn. No. MZR/46/2009-2011
RNI Regn. No. 40380/88

From :
Manager
Ramthar, Synod Office
Aizawl - 796 001,
Mizoram, India
Phone : 2325899

RAMTHAR
(Mission)

To

*Published by Rev. Lalchhuanmawia and Printed at the
Synod Press, Aizawl on behalf of Ramthar Association,
Aizawl, Mizoram. Copies - 22,200*

Visit us : www.mizoramsynod.org